

Züri hey

i chume us dä tüfschte Provinz  
wo's nach Chuämischte nume schtinkt  
all wo da wohnt kapiäret nüt  
was söll i mit so schtiäre Lüüt  
nur ich bi kuul und has gnau tschäggt  
Züri nur isch das wo fägt  
drum schtygi i min tjunte BMW  
dä Bappi zalt mer s'Leasing, das rockt ou yeah  
bim Zalando bini go shoppe  
mis Outfit isch faschd nüme z'toppe  
dä Kanton woni här bin zeigi gern ihr müends verschtää  
drum ziän ich mir ezz au no diä wysse Socke aa

mir gönd uf Züri hey  
det isch vill besser hey  
det isch es schpitz  
s'isch waar es isch kän Witz  
mir gönd uf Züri hey  
det isch es lässig hey  
det isch es scharf  
will i det kokse darf

s'Kaff woni woone macht uff save  
s'git kei Tekkno und kei Rave  
s'git nume Treui und kän One Night Stand  
Schwuli, Lesbe oder so isch nüüt was dette wänd  
Jede Sunntig Burezmorge und faschd kei Rock  
nume jöörlich i de Merzwäckhalle Gogo's Partybox  
nai das isch nid das, was i wott  
drum faareni uff Züri und das allpott

mir gönd uff Züri hey  
det isch vill besser hey  
zum Rave gaa  
schtani gärn zwei Schtunde aa  
mir gönd uff Züri hey  
tanze umtschägg umtschägg umtschägg hey  
und schlucked Pills  
das bring öis ganz schön vill

In Holzwil s'läbe isch kän Wahn  
s'git aifach nüt nur äs Bordell ar Autobahn  
im Volg da schnättered diä alte Tante  
wiä überall het es au äs paar Migrante  
für s'Wone bruchts nöd so vill Gäld  
derfür bisch voll am Arsch vo derä Wält  
s'hät no Chlychind und diä Alte  
s'Gmeindhuus, d'Poscht im Nachbarcaff diä tüend dä Scheiss  
verwalte

Nur ich bi Cool Man has gnau tschäggt  
Züri nur isch das wo fägt  
Züri nur, Züri nur  
du fäggsch

Mir gönd uff Züri hey  
det isch so lässig hey  
da machi mit  
und chauf dä beschti Schitt  
mir gönd uff Züri hey  
da gits äs läde hey  
mit pumptem Gäld  
häscht meh vo dere Wält  
mir gönd uf Züri hey  
deet isch so Groovy hey  
und Dope häts vill  
chasch inenäh was d'willsch

Hey Babe schtiig doch au ii i min geile BMW und dänn mached mer  
wider mal ä Tuur uff Züri und riisset e Wälle. Verschtasch da isch  
aifach alles ganz anders und alles isch total guät druff. Du bisch  
doch au nöd würkli vo geschter oder hä? Oder wettisch am Ändi öppe  
dä Ueli vom Glunggehof hürate oder? Verschtaasch in Züri isch  
aifach alles so abgfackt geil, verschtaasch s'hätt ganz anderi  
Vibes.

Da ischs en Aaschiss.

u de

ä Büüru faschd im Ämmitau  
schteyt früäch am Morge uuf  
u är weyss dass är hüt morge  
eygetly chly büggle muäss  
är geyt uff's Hübeli z'Hingubank  
au säget ihm dä Fritz  
det schteyt sis Schöpfli haub verfaule  
u das wird ezze gflickt  
süüferli mit där Sagi  
schnidit är neuì Bauke zuä  
dummerwiis do weyss är ou  
s'gyt gäng no cheybe vüu zum tuä  
plötzlich isch diä Donners Sagi  
uff dä Bode ache gheyt  
d'Sagi isch kaputt  
u s'Schöpfli isch ezz ganz vergheyt

u de u de u de u de  
seyt dä Fritz s'isch emu nid perfekt  
u de u de u de u de u de  
das cheybe Zügs isch abverreckt  
wenn i wenn i wenn i wenn i wenn i  
aubä de gly ä neue Sagi ha  
fan i fan i fan i fan i fan i  
de no mau vo voore aa

gäg en Aabe faart är de uff Burtlef  
eys go ziä i dä Bahnhof Bar  
är sorgt sech um sys Schöpfli  
bschteut s'paar Bier u de isch auäs klar  
u frogt sech nach em sächste Biär  
villecht isch das ezz scho z'vüu  
de chunt de plötzlech s'Fränzi iche  
s'schönschte Modi vo Mötschwüu  
zäme hey si trunke  
är hett gengume karisiärt  
das hett em Fränzi gfaue  
das zeygt si unschiniärt  
de faare se zu ire hey  
zwöi Liniä sy scho uff em Tisch  
diä ziä sy schnäu nach hingere  
wüu ou das erotisch isch  
de ligge sy am Bodä  
grabsche, sy ganz huäere scharf u so  
vüu wiiter sy sie bi däm Schpiu  
de leyder nümme wüürklech cho

u de u de u de u de u de  
s'Fränzi seyt s'macht emu nüt wes ezz nit geyt  
we de we de we de we de web de  
nit aues immer richtig schteyt  
chasch de chasch de chasch de chasch de chasch de  
widär mau uff beyde Scheyche schtaa  
föi mer föi mer föi mer föi mer föi mer  
haut no mau vo voore aa

ir Houptschtadt makes Politik  
im grosse Bundeshuus das müess sy  
diä eynte tüä chly lavere  
di meyschte mached gärn äs Pfüsi  
öppis angers wey si nid  
jede däicht warum sött me das mache  
mir heys Erschtklass GA u d'Bezüg  
s'isch gäng guät so oni neuu Sache

u de u de u de u de u de  
öppis ändere chänti schwär  
wüu de wüu de wüu de wüu de wüu de wü de  
gäbt's gäng Schtritt u äs Risekäär  
äuäää äuäää  
laat me aus besser so wiä s'isch la schtaa  
we me we me we me we me we me  
gäng juflet wurdi gar nüt ga

diä beschti Schwizer Mannschaft  
jeeuu diä chunt vo Bärn  
diä grossä Schtars vom Wankdorf  
de lüchtend gäubi Schwiizer Schtärn  
sie schutte gäng niä gleytig  
aber d'Chugle diä louft rund  
u bi jedem Mätsch  
hey sy iiry Viärtelschtung

u de u de u de u de u de  
dr Basler dä schisst's aa  
wüu YB YB YB YB YB  
vüu besser schutte chaa  
item item item item item  
Meyschter si sy äntlech worde  
süüferli süüferli  
hey sy uff Fähler g'wartet u s'dä Angere verdorbe

u de u de u de u de u de  
we de we de we de we de we de  
wüu de wüu de wüu de wü de wüu de  
süüferli süüferli  
item item item item item  
äuää äüää äüää

## Schwabezollblues

S'isch wider Samschtag und d'Schwiizer gönd go poschte  
das machet's nit dihey da het me z'höchi Choschte  
und faaret drum uff Konschtanz oder Singe  
das duät de Lade dööt vill guäte Umsatz bringe  
dött isches doch nur halb soo tüür  
Zrugg git's die ganzi Umsatzschtüür

die tütschi Gränze isch gnuäg lang das isch nit mies  
än jede chunnt i's Iichaufsparadies  
Nach Waldshuät, Rhyfälde, Laufeburg, Säckinge  
chönt sy ire Iichaufszäddel bringe  
au in Lörrach, Gränzach oder Weil  
sind d'Lade alli offe das isch geil

Das isch dä Schwabezollblues  
das isch dä Schwabezollblues  
das isch dä Schwabezollblues  
das isch dä Schwabezollblues  
Herr Piefke und Frau Lämpel  
die wänd än Uusfuärschtämpel

Jetzt sind's im Lade und äs isch en Gnuss  
Än jede tramplet jedem uff dä Fuess  
a dä Kasse frögt Frau Oberlin  
„wiä goot das mit em Uusfuärschiin?“  
Und hinder iire schimpfets unscheniert  
will d'Frau Oberlin das lang nid ganz kapiärt

Äntlich goots in nöchschte Lade  
Dä Unkel Herbert feufeachtzgi zwickt es i de Wade  
und Tante Vreni drüenünzgi wetti hei  
diä beide Chlychind machet jez äs Gschrey  
doch eigetli sind diä nur da  
demit me no meh chaufe chaa

Jez faarets wieder hei doch s'Navi weiss es gnau  
bi dä Rückreis git's zwei Schtund scho Schtou  
Und so sind sie voller Wonne  
zmitt's mit dä andre ir Kolonne  
das Warte findet keine toll  
dä schuldig isch dä Schwabezoll

Äntli a de Gränze bruchts Geduld  
S'git kei freiy Parkplätz au da sind d'Schwabe tschuld  
Dä Herbert feufedachtzgi schtiigt jetzt z'mitdrin uus  
Mit all dene Fötzle wo me schtämple muäss  
Grad uff dä Autobahn, demit es schnäller goot  
zum Glück brämsts scharf von hinne suschd wär de Herbert tot

Dä Herbert shtoot am Schalter doch ohjee!  
Er nimmt jede Fötzel einzeln us em Portemonnaie  
und faltet's uuf ganz zittrig Shtück für Shtück  
und hett au bi däm Tschobb keis schaurigs Gschick  
De Zöllner a däm Schalter dä tuät froge  
„Schaffen Sie das heute oder erst morgen“?

d'Warteschlange wächst jez riisig aa  
doch de Herbert chan das nöt versctoo  
und suächt nervös ojee! i sim Portmonnaie  
sit gfüälte zää Minute nach sinere ID  
und plötzlich schreit vo hinde de Herr Fenner  
„Mached fürschi Ihr Beamtepenner!“

Das isch dä Schwabezollblues  
das isch dä Schwabezollblues  
das isch dä Schwabezollblues  
da chunt keine meh drus  
Dä Herr Schtäubli und Frau Hilfiker  
findet's schtämple nit so schwer.

Am Ändi vo däm Schalter da hockt en grüäne Maa  
En Schtämpel i dä Hand und für das isch er daa  
Er findet's nöd so schwär es isch jez halt sin Job  
Au wänn's Lüüt git wo meinet er seig en Idiot  
Nur sälte wird er arrogant und bitter  
sin Job en huere Sctress und dä Lohn doch schitter

Für ihn isch s'Läbe da doch ehnder tüür  
und er zahlt im Gägesatz diä ganze Umsatzschtüür  
doch wänner poschtet macht er au kän Mucks  
wänn en Schwiizer Schtämpler arrogant sich aifach füredrukt  
Sälte isch de Wahnsinn z'viel, nur öppis nimmt en wunder  
händ d'Schiizer, d'Schwobe am Änd gar beid  
de huere Scheiss erfunde

Das isch dä Schwabezollblues  
das isch dä Schwabezollblues  
das isch dä Schwabezollblues  
das isch dä Schwabezollblues  
Es schreit vo hine de Herr Fenner  
mached fürschi iih Beamtepenner

## Schöni Auge

Mängisch bin i truurig  
und mängisch han i Glück  
wett mis Läbe sälbscht beschimme  
und weiss dass es nid so isch  
und weiss dass es fasch niä so isch

Luäg mi doch mit dine schöne Auge aa  
Luäg mi doch mit schöne grünäbrune Auge aa

Voreme Monet hesch du gseit  
du haltisch's nümme us  
überall nur Schtress und Lämpe  
und än Tschobb wo nit sy muäss  
und än Tschobb wo aifach nit sy muäss  
han der gseyt dänn gasch halt jez  
vertrau du dine Gefühl  
doch wo du dänn gange bisch  
hani gmerkt da duss isch chüäl  
hani gmerkt da duss isch huäre chüäl

Luäg mi doch mit dine schöne Auge aa  
Luäg mi doch mit schöne grünäbrune Auge aa

Jetzt hock i da und bin eley  
äs s'goot mer guät eso  
nimm no chly vom wisse Pulver  
und wirde deby froh  
lose dezuä Liäder  
vom Lou Reed uff Spotify  
s'chunt mer vor er singt devo  
was ich will und was ich mein  
was ich will und was ich mein

Luäg mi doch mit dine schöne Auge aa  
Luäg mi doch mit schöne grünäbrune Auge aa

Bisch lang scho zäme mitnem guäte Typ  
das gönnt ich ihm und dir  
nur was ich vo dir wüsse will  
machscht du no äs Date mit mir?  
machscht du am Aabig no äs Date mit mir?

Luäg mi doch mit dine schöne Auge aa  
Luäg mi doch mit schöne grünäbrune Auge aa

Hetti no füffzg Schtutz im Sack  
dänn chämti ich zu dir  
schiig is Taxi und s'gaat los  
schtan scho bald a dire Tüür

schtan scho bald a dire Tüür  
Ich chlopf zweimal du machsch mer uuf  
I füäl mi guät bi dir  
gib mer ä Zigi gib mer FÜR  
und dänn bring mer no äs Bier  
und dänn bring mer bitte no äs Bier

und

Luäg mi doch mit dine schöne Auge aa  
Luäg mi doch mit schöne grünbrune Auge aa  
Luäg mi doch mit dine schöne Auge aa  
Luäg mi doch mit schöne grünbrune Auge aa

No öppis muäss der säge  
i wünsche mir eso  
du wärsch mini Julia  
und ich din Romeo  
und ich din Romeo



## Aldi

letschti bini i wider s'Dütschland gsy  
und dött im Aldi chaufen i  
all diä schöne Tetrapack  
mit em guäte wisse Wii  
Trube us EU, liäblich im Gschmack  
isch was uff de Verpackig schtaat  
dä Wii schmöckt süffig und nöd schwär  
s'liäblich chunnt vom Zucker här  
Sulfit hätts din für en guäte Zwäck  
niä verdirbt er s'isch immer perfäkt  
eis fufzg für fufzäh Dezi isch de Priis  
da scheidred s'Suffä nöd am Gäld, da sind si nöd so fies  
bi däm Zügs da schtimmt d'Chemie  
konsumiäre literwiis, en Kater han i niä

I gange hei und trink dä Wii vom Aldi  
hani gnuäg trunkä jo denn schlof i bald i  
was i suschd han wele mache lani halt sii  
bim ene guäte Schlückli Wii vom Aldi

Am Mäntigmorge chumi i dä Bude aa  
dä Scheff wo suscht niä da isch schtaat scho daa  
är seit zu mir i bin so frey  
produziäre nume na i dä Turkey  
logisch du bisch au betroffe  
i zwei Mönnet isch din Tschobb dänn gloffe  
und logisch du bisch au betroffe  
i zwei Mönnet isch din Tschobb dänn gloffe

Ich gang jez sofort hei und trink dä Wii vom Aldi  
hani gnuäg trunkä jo denn schlof i bald i  
für dich Arsch no lenger schaffä lani halt sii  
bim ene guäte Glesli Wii vom Aldi

Am Zischtigabig kochi Znacht für d'Madeleine  
du findsch mich kuul, ich find dich wunderschöön  
und s'chunt ganz plötzlich dass i total gschpüür  
ich wett vill meh vo dir als du vo mir

Du gasch hei, ich trink dä Wii vom Aldi  
hani gnuäg trunkä jo denn schlof i bald i  
chan nüt derfür dass i so i dich verknallt bi  
zum s'überschtaa da bruchts en guäte Schluck vom Aldi

Im Chüalschrank hani no vill Wii vom Aldi  
hani gnuäg trunkä gaats mer guät dänn lani alls sy  
bi kän Wältverbesserer, Steitmentposter glaub's mir  
mir proschtet zäme liäber mit däm Shtoff vom Aldi  
bi kän Revolutionär und ha käi Flair glaub's mir  
Mer suuffet wiiter vo däm geile Wii vom Aldi  
dusse chönnti d'Sunne schine, s'chönnt au grau sie  
ich will's und muäss's nöd wüsse ich schlaf bald i

## Villicht

Warum bisch du jez cho  
muäsch ja scho wider wäg  
du häsch mer mis Härz gnaa  
und rüärsch es in Dräck  
ich bin e kän Glünggi  
bin au en Mänsch wiä du  
und liislig schlaat mis Härz dir zuä  
ich bin e kän Glünggi  
bin au en Mänsch wiä du  
und liislig schlaat mis Härz dir zuä

Und liäbsch du en Andre  
isch's guät du säisch mer's niä  
ich chönnt's nöd verträge  
mis Härz schlaat nur für di  
ich bi doch scho z'fride  
wänn dini Hand jez gisch  
und liislig zu mir seisch "villicht"  
ich bi doch scho z'fride  
wänn dini Hand jez gisch  
und liislig zu mir seisch "villicht"

Villicht bisch du im Läbe  
en guäte Kumpel gsy  
villicht waisch du scho morn  
ich liäbe doch nur dy  
villicht seisch mer ja  
villicht seisch mer nei  
villicht isch das Glück nur zum Schii  
villicht seisch mer ja  
villicht seisch mer nei  
villicht isch das Glück nur zum Schii

Erschd wänn du mit em Andre  
im Schtandesamt schtasch  
erschd wänn du mit em Andre  
de Wäg dur's Läbe gasch  
erschd wänn du em Andre  
di Hand zum Läbe g'isch  
erschd dänn sägi nüme villicht  
erschd wänn du em Andre  
di Hand zum Läbe g'isch  
erschd dänn sägi nüme villicht